

սրալէս թէ՛ ըստ մտաց դաշնագրոյն Օմարայ, և զօրութեան
 հրովարտակաց Օսմանեան կոյսերաց՝ ժառանգութիւն սուրբ
 Երկրին և Ս. Տեղեաց աւանդեալ իցեն Յունաց, և Հայք
 զինի՛ ժամանակաց եկեալ անդ՝ և վանք Ս. Յակոբայ լեալ
 իցէ՛ ՚ի բնէ՛ Պատրիարքարան նոցին, եւ ինքեանք իբրեւ
 ողորմութիւն՝ ՚ի վարձու տուեալ իցեն նոցա. և թէ՛ Հայք
 պատիր խաբէյութեամբ ստացեալ են զգիրսն, եւ նոքա
 եւս օրինակք եւ ոչ նախատիպք, և թէ՛ ամենայն ազգք
 քրիստոնէից յերուսաղէմ՝ պարտին հնազանդիլ Պատրիար-
 քին Յունաց. և նախ նորա անկ է կատարել զօրէնս՝ և ա-
 պա այլոց, և այն եւս կամօք և հաճութեամբ նորին։ Յայս
 գիր ձեռնարկեալ կնքեցին Պատրիարքունք Երուսաղէմի
 և կոստանդինուպօլսի, և 18 երեւելի եպիսկոպոսունք՝ եւ
 աշխարհականք ոչ սակաւ։ Եւ խնդրէին իսկ զմանս ՚ի
 գլխաւորացն Հայոց գլխապարտ ածել ՚ի Դուռն, որ և ըմ-
 բռնեցան ոգիք երկու, Սեղրոս և Մելիտոն Ամիրայք եւ
 եղան ՚ի բանտի։ Ուր ուրեմն լու եղեւ յականջս ազգին
 պատրաստութիւնք և գործք Յունաց, և սկսան դիմել այսր
 և անդր, այլ գտին զբարեկամս իբրեւ զթշնամիս՝ և զըն-
 տանիս իբրեւ զօտարացեալս, եւ չգտեալ ՚ի նոցանէ՛ օգ-
 նութիւն ինչ՝ մատուցին գիր աղաչանաց առ Եպարքոսն
 կիւրճի Իսմայիլ Փաշա՝ քահանայիւք եւ խուռն բազմու-
 թեամբ ժողովրդոց՝ եւ խնդրեցին ատեան դատաստանի,
 զի երկու ազգաց հանդիսանալ յատենի կայսեր և արդա-
 րացի քննութեամբ վճարել զիրսն, յայտնի կացուցանելով
 իւրաքանչիւր ոք զիրաւունս իւր։ Հաճեցաւ ընդ այս Ե-
 պարքոսն՝ և սահմանեցաւ օր. Հայք գնացին ՚ի Դուռն՝
 յորում ժամագիր լեալ էին, այլ լուան պատասխանի՛ թէ՛
 այսօր չլինի, գնացէք ՚ի տեղիս ձեր, մինչեւ ազգ արաս-
 ցուք ձեզ։ Քանզի Յոյնք խոյս տուեալ աստի՛ ոչ կամէին
 հրապարակաւ ՚ի դատ մտանել, այլ հնարիւք եւ բռնու-
 թեամբ տիրել այլոց իրաւանց, որոյ վասն լուեցուցին ըզ-
 դատաւորսն առ ժամանակ մի՝ ձեռնարկել յայլ իմն խոր-
 հուրդ ըստ սաղրելոյ Եպարքոսին։

Ապա անցանել աւուրց ինչ՝ Պատրիարքունք Յունաց
 նզովիւք պատուիրեցին ժողովրդոց յամենայն եկեղեցիս
 մայրաքաղաքին երթալ տալ գիր աղաչանաց առ Թագաւ-